

Ceremonia protocolario dia di independencia di Venezuela



ORANJESTAD – Ayera mainta a tuma luga un acto protocolario di ponemento di ofrenda floral dilanti di estatua di Simon Bolivar ariba cabay pa conmemora e di 207 aniversario di independencia di Venezuela.

E acto aki a conta cu presencia di e mision diplomatico di Venezuela encabesa pa su consul nobo, Carlos Mata Figueroa, kende a duna un elocuente discurso tocante Libertador Simon Bolivar su vida y su lucha pa libertad di Venezuela y otro paisnan di Latino America. E biaha aki e discurso no a wordo enfoca riba e logronan di e gobierno socialista di Venezuela, sino cu e tabata un discurso hinca den un contexto historico den cuadro di nan fecha di independencia di 5 di juli di 1811.

Tambe prome minister, Evelyn Wever-Croes a trece dilanti su discurso den brece Spaño, unda e mandatario a referi na e relacion historico cu semper a existi riba tereno familiar, comercial y cultural entre ambos pueblo. El a bisa cu awe nos tin na Aruba generacionnan di Venezolanonan cu a bin biba riba nos isla. “Mi no sa cuanto generacionnan nan ta exactamente, pero nan ta hopi. Cu orguyo mi ta sinti mi ta parti di e generacion ey”, e mandatario local a bisa. Tambe el a laga sa cu e generacion di Venezolano aki a integra nan mes y nan a uni na e lucha di nos pais pa crea un miho futuro. E mandatario a referi tambe na e frase inmortal di e estadista Betico Croes, caminda el a referi cu e Arubiano no ta esun cu



a nace riba nos isla. Sino cu Arubiano tambe ta esun cu a haci di Aruba su nacion, hogar y patria.

Prome minister Wever-Croes a finalisa cu breve discurso gradiciendo e comunidad Venezolano cu a laga nan hogar y nan famia pa busca un miho futuro pa nan. Pero tambe pa brinda nan ayudo pa Aruba por desaroya su economia.

“Awe mi ta felicita boso pa e dia tan importante pa e comunidad Venezolano”, el a bisa. Un biaha mas el a expresa su palabra di danki na e comunidad Venezolano pa tur loke nan a haci pa nos pais. E mandatario a termina su discurso bisando: “Gloria al bravo pueblo!”

E ceremonia aki tambe a conta cu presidente di parlamento, Ady Thijzen, director di departamento di Relacion Exterior, Edwin Abath, miembronan di e cuerpo consular acredita na Aruba y invitadonan den general.

